

- जैसलमेर मांय जीएसटी काउन्सिल री 55वीं मीटिंग पूरी व्ही।
- राजस्थान हाईकोर्ट जयपुर गैस टैंकर हादसा रो संज्ञान लीनो— राज्य सरकार ने जांच कर र दोषी अहलकारां ने सजा दिरावण रा हुकम दीना।
- मुख्यमंत्री भजनलाल शर्मा बजट मांय करी ज्या ऐलाण ऊं जुड्या जमीं आवंटन रा बाकी मामला बेगा निपटावण रा हुकम दीना।
- प्रदेश मांय न्यूनतम तापमान मांय बधोतरी—केई ठौड़ां घणा कोहरा ऊं जिन्दगी माथे असर पड्यो।

000

जीएसटी काउन्सिल री 55वीं मीटिंग आज जैसलमेर मांय व्ही। वित्तमंत्री निर्मला सीतारमण री सदरत मांय राख्यी ज्यी ई मीटिंग मांय न्यारा-न्यारा मामलां माथे विगतवार चर्चा करी ज्यी। मीटिंग रा पहला सत्र पाछे बिहार रा वित्तमंत्री सम्राट चौधरी बतायो के सत्र मांय चर्चा रे दौरान बीमा माथे रियायत रा बारा मांय कोई फैसलो नी करी ज्यो। कह्यो के ई बारा मांय जनवरी मांय व्हेवण वाळा मीटिंग मांय और विचार कर्यो जावेला। उत्तराखंड रा वित्तमंत्री प्रेमचंद अग्रवाल बतायो के मीटिंग मांय कुछ फैसला करी ज्या। ई बीचे, मीटिंग मांय सिरकत करण सारू आया न्यारा-न्यारा राज्या रा मुख्यमंत्री अर वित्तमंत्री आज जैसलमेर रो दौरा कीनो। जम्मू-कश्मीर रा मुख्यमंत्री उमर अब्दुल्लाह स्वर्णनगरी मांय सैर-सपाटा री न्यारी-न्यारी ठौड़ां ने निरखी। वित्त मंत्री खबरनवीसां ने सम्बोधित कर रही है।

000

राजस्थान हाईकोर्ट री एकलपीठ रा जज न्यायमूर्ति अनूप ढंड संज्ञान ले र अजमेर जयपुर हाईवे माथे भांकरोटा मांय काल व्हा गैस टैंकर हादसां रा मामला मांय राज्य सरकार ऊं जांच कर र दोषी अहलकारां ने सजा दिरावण रा हुकम दीना है। जज कह्यो के ज्यां अहलकारां री लापरवाही रे कारण इत्तो मोटो हादसो व्ह्यो, वां री ठां कर र वां ने सजा दी जावणी चाहिजे। ई सागे ई ई हादसा मांय मरण वाळां रा पिरवार वाळां ने अर जख्मी लोगां ने उचित मुआवजो देवण री तुरत व्यवस्था करण बाबत् ई कह्यो। उपमुख्यमंत्री दिया कुमारी कह्यो है के सरकार रो काल जयपुर कने व्हा गैस टैंकर हादसा मांय जख्मी लोगां री जिन्दगी बचावण माथे खास ध्यान है। वे आज ई हादसा मांय जख्मी लोगां रो हाल-चाल पूछण सारू जयपुर रा सवाई मानसिंह अस्पताल रो दौरा कीनो। दिया कुमारी बर्न यूनिट मांय बाहरी लोगां रे दाखिल व्हेवण परां करड़ाई ऊं रोक लगावण बाबत् कह्यो ताकि संक्रमण ने रोक्यो जा सके। भाजपा रा प्रदेश अध्यक्ष मदन राठौड़ ई आज एसएमएस अस्पताल रा अधीक्षक डॉ. सुशील कुमार भाटी सागे बातचीत कर र जख्मी लोगां रा स्वास्थ्य रा बारा मांय जाणकारी लीनी। कांग्रेस रा नेता अर राज्य रा पैली वाळा उपमुख्यमंत्री सचिन पायलट ई आज एस.एम.एस. अस्पताल जा र झुलस्योड़ा लोगां रो हाल-चाल पूछ्यो। ई बीचे काल व्हा गैस टैंकर हादसा मांय मरण वाळां री तादाद 12 व्हे ग्यी है।

ई हादसा री फेंट मांय आया 3 जणां हाल ई लापता है। पुलिस हादसा ऊं जुडी एफ.आई.आर. दर्ज कर र घटना रा सगळा पहलुआं री जांच कर रही है। जयपुर रा पुलिस उपायुक्त पश्चिम - अमित बुढानिया आकाशवाणी ने बतायो के हादसा मांय मरण वाळा ज्यां लोगां री लाशां री पिछाण नी व्ही है, वां रा डीएनए सैंपल ले र पिछाण री कोशिश करी जा रही है।

000

राज्यपाल हरिभाऊ बागडे विश्वविद्यालयां ऊं किसानां रा भला सारू खेती-बाड़ी री नुवी प्रौद्योगिकी विकसित करण सागे शोध करण बाबत् कह्यो है। वे आज उदयपुर मांय महाराणा प्रताप कृषि अर प्रौद्योगिकी विश्वविद्यालय रा दीक्षांत समारोह मांय बोल रह्या हा। राज्यपाल प्राकृतिक खेती रा विकास रे जरिये देश ने आगे बधावण माथे जोर दीनो। श्री बागडे रासायनिक खेती ऊं व्हेवण वाळा नुकसान री चर्चा करता थकां नौजवानां ऊं प्राकृतिक खेती करण री अपील कीनी। वे पाणी री बर्बादी रोकण माथे ई जोर दीनो। कार्यक्रम मांय राज्यपाल महाराणा प्रताप कृषि अर प्रौद्योगिकी विश्वविद्यालय रा एक हजार ऊं बत्ता विद्यार्थियां ने उपाधियां अर तमगा दे र नवाजा। राज्यपाल उदयपुर मांय राजस्थान पशु चिकित्सा अर पशु विज्ञान विश्वविद्यालय रा तैत बणायी ज्या नवानिया कॉलेज मांय अतिथि गृह, चारदीवारी अर कॉलेज परिसर रा शिव मंदिर ऊं जोरजी का खेड़ा ताई सड़क बणावण रा काम री

सरूआत ई कीनी। राज्यपाल उदयपुर मांय शिल्पग्राम महोत्सव री सरूआत कीनी। जळसा मांय नामी भवाई लोक नर्तक डॉ. रूप सिंह शेखावत अर कठपुतली कलाकार गणपत सखाराम मसग ने डॉ. कोमल कोठारी लाईफटाइम अचीवमेन्ट अवार्ड ऊं नवाजा जावेला। पश्चिम क्षेत्र सांस्कृतिक केन्द्र री ओर ऊं राख्यो जा रह्यो ओ उत्सव तीस दिसंबर ताई चालेला।

000

शिक्षा मंत्री मदन दिलावर विद्यार्थियां ने गुणवत्ता अर संस्कार वाळी तालीम देवण रा सगळा जरूरी जतन करण बाबत कह्यो है। वे आज जयपुर मांय शिक्षा विभाग री समीक्षा बैठक मांय बोल रह्या हा। मीटिंग मांय बजट मांय करी ज्या ऐलाण ऊं जुड़ा कामां री प्रगति रो जायजो लियो ज्यो। ई मौके स्कूल शिक्षा विभाग रा शासन सचिव कृष्ण कुणाल स्कूलां मांय मुहैया करायी ज्यी शिक्षण सामग्री काम लेवण अर व्यावसायिक सिखावण लेवण वाळा विद्यार्थियां ने नौकरी-धंधा ऊं जोड़बा समेत न्यारा-न्यारा मुद्दा रा बारा मांय जाणकारी दीनी।

000

मुख्यमंत्री भजनलाल शर्मा बजट घोषणावां ऊं संबंधित भू-आवंटन रा बाकी मामला बेगा निपटावण रा हुकम दीना है। वे 31 दिसम्बर ताई बाकी मामलां रा भूमि चिन्हीकरण अर भूमि रा प्रस्ताव संबंधित विभाग ने भिजवावण अर आवंटन री प्रक्रिया पूरी करण रा हुकम दीना। मुख्यमंत्री कह्यो के बजट घोषणा री अनुपालना मांय स्पोर्ट्स कॉलेज, रोडवेज बस स्टैंड, जीएसएस अर ठोस कचरा प्रबंधन सारू प्रोसेसिंग प्लांट, औद्योगिक पार्क सारू भू-आवंटन रा मामलां मांय तेजी लायी जावणी चाहिजे। श्री शर्मा वाहन दुर्घटनावां माथे असरदार तरीका ऊंक काबू करण सारू सड़कां रा दुर्घटना संभावित स्थानां री पिछाण कर र वां ने तुरत सुधारण बाबत कह्यो।

000

प्रदेश मांय भजनलाल सरकार रा कामकाज रो एक साल पूरा व्हेवण रा सिलसिला मांय श्रीगंगानगर मांय आज **एक साल बेमिसाल** कार्यक्रम राख्यो ज्यो। इण मांय उपमुख्यमंत्री डॉ. प्रेमचंद बैरवा, मंत्री जवाहर सिंह बेढम, के.के. बिश्नोई, जोगाराम पटेल, गौतम कुमार दक, अविनाश गहलोत, सुरेश सिंह रावत समेत जनता रा केई नुमाइन्दा शिरकत कीनी। ई मौके उपमुख्यमंत्री कह्यो के राज्य सरकार जनता रा भला सारू पहला ही साल पूरा मन ऊं काम कीनो।

000

राज्य मांय चाल रह्या सुशासन सप्ताह रा तीजा दिन आज **भीलवाड़ा** जिला रा आसींद मांय ब्लॉक स्तर रो शिविर लगायी ज्यो। शिविर मांय जनता री समस्यावां सुण र वां ने दूर करण बाबत जरूरी कार्यवाही रा हुकम दिया ज्या अर जैविक खेती रा बारा मांय जाणकारी दीरीजी। **बाड़मेर** जिला री रामसर अर आडेल पंचायत समितियां मांय प्रशासन गांव की ओर अभियान रा तहत खास शिविर लगा र जनता री शिकायतां रो निपटरो करी ज्यो। **केकड़ी** री टोडारायसिंह पंचायत समिति मांय लगायी ज्या प्रशासन गांवों की ओर शिविर मांय 36 मामला मौके ई निपटायी ज्या। **हनुमानगढ़** जिला रा बिरकाली, निनाद अर रोही मौजा दिखनादा मांय लगायी ज्या शिविरां मांय ई जनता री शिकायतां सुणी ज्यी। नोहर मांय जिला कलेक्टर पेंशन रो एक जूनो मामलो तुरत निपटायो।

000

आज विश्व ध्यान दिवस मनायी ज्यो। प्रधानमंत्री नरेन्द्र मोदी जनता ऊं ध्यान ने जिन्दगी रो हिस्सो बणावण री अपीली कीनी। एक सोशल मीडिया पोस्ट मांय वे कह्यो के ध्यान इंसान अर समाज री जिन्दगी मांय शांति अर समरसता लावण रो मजबूत जरियो है। श्री मोदी कह्यो के तकनीक रा मौजूदा दौर मांय ऐप अर वीडियो ध्यान ने अपनावण मांय मददगार साबित व्हे सके है। ई मौके प्रदेश मांय ई न्यारा-न्यारा कार्यक्रम राख्यो ज्या। **हनुमानगढ़** रा सरकारी मेडिकल कॉलेज मांय **"वैश्विक शांति और सद्भाव"** मुद्दा माथे ध्यान रो कार्यक्रम राख्यो ज्यो। जयपुर रा सवाई मानसिंह मेडिकल कॉलेज रा हृदय शल्य चिकित्सा विभाग मांय सह आचार्य अर योग शिक्षक डॉ. मोहित शर्मा बतायो के ध्यान तनाव मुक्त जिन्दगी सारू घणो काम रो है।

वे कह्यो के ध्यान न केवल बीमारियां ऊं बचावे है बल्कि इण ऊं जीवन मांय उत्पादकता ई बधे है।

000

राज्य मांय आज केई ठौड़ा घणा कोहरो दर्ज करी ज्यो। हालांकि न्यूनतम तापमान मांय बधोतरी अर बादळ मण्डया रहवण ऊं सर्दी रो असर थोड़ो कम पड़्यो है। मौसम विभाग रे मुजब सीकर रा फतेहपुर मांय आज 4 दशमलव 3 डिग्री सैल्सियस न्यूनतम तापमान दर्ज करी ज्यो। माउंटआबू अर हनुमानगढ़ रा संगरिया मांय 4 दशमलव 4, सीकर मांय 5 अर पिलानी मांय 5 दशमलव 6 डिग्री सैल्सियस न्यूनतम तापमान रिकॉर्ड करी ज्यो। बारां, भरतपुर, भीलवाडा, बालोतरा अर हनुमानगढ़ समेत केई ठौड़ां घणो कोहरो रह्यो। चूरू मांय घणा कोहरा रे कारण आवण जावण माथे असर पड़्यो।

000

पाली ज़िला रा सादड़ी मांय सात ठौड़ां ज़मीं हेटे पाणी रो लेवल बधावण सारु ज़िला कलेक्टर **कैच द रैन** कार्यक्रम री सरुआत कीनी। वे बतायो के इण ऊं जनता ने डार्क जॉन ऊं निजात मिलेला। कलेक्टर बतायो के बिरखा रे दौरान पाणी भेळो व्हेवण वाळी ठौड़ां रेनवाटर हार्वेस्टिंग रा तैत वाटर रीचार्ज कुआं बणाया जावेला।

000